



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

Biden-i Mississippi nung emergency sangdong

ISSF World Cup: Kaur Samra-i Bronze medal angu



VOL. XX NO. 164 (ADOK 164) DIMAPUR TENTONÜ (MONDAY)

METSÜREMI (MARCH) 27, 2023

₹ 5.00

## BJP-i Rahul Gandhi anentsüba aitsür: NPCC

Dimapur, March 26, 2023 (TYO): BJP yimsüsüba kübok auertem chioker saka nübertem asoshi ola adokertyem tepuokdak ayur ta Rahul Gandhi MP nungi anentsüba ajanga sayur, ta Nagaland Pradesh Congress Committee (NPCC)-i metetdaksüogo.

Iba inyakyim ajanga democracy mali kümdaktsür aser pei bilemba lemsatepba temeten ajembanger. Surat High Court indang obendang ya memetongshira tarutsü nunga iba amai dang inyaka aotsü, ta Communications Department, NPCC sangdong ka nung ashi.

Iba ken o ya Modi tenüing atema lir. Auertem ta tai tongloksürtem ya Lalit Modi aser Nirav Modi na lir aser tena anema ken o ano mangadang lir aser tenaprong ya ozüing nungi jenshia senzürtem lir ta parnokisa ashi.

Rahul anema ken o benoksang ya Modi ka lir aser pa ya BJPMLA Purnesh Modi lir. BJP indang nükjidonggi ochimashi inyaktsü atema tashi angutsüba lir. Parnok tsüingdang public-i pei sasa kümzüka melitetsü mesüra aibelenertem anema ola madoktetsü, ta NPCC-isa metetdaksü.

## Anogo 149 sülen nisung teimtiba dak COVID-19 putet

New Delhi, March 26, 2023 (Agencies): India nung anogo 149 sülen nisung teimtiba dak coronavirus putetogo, ta Union Health Ministry-i Deobarnü metetdaksü.

Deobarnü nisung 1,890 dak Covid-19 aliba putetogo aser tang nisung 9,433 anepaludar, ta parnokisa ashi.

Yaküm October 28 nü India nung nisung 2,208 dak Covid-19 putet aser iba ya anogo ka nung nisung teimtiba dak putetba liasiü.

Külen, tesüiba ghonda 24 tsüingda Covid-19 puteta alir nisung 7 asüba züingsema tasür ajak agi 5,30,831 kümogö. Maharashtra aser Gujarat nung nisung anana asü aser Kerala nung asem asü.

India nung nisung 4,41,63,883 tashi COVID-19 nungi taneptsü nguogo aser Covid vaccine indang dose 220.65 crore agütsüogo, ta Union Health Ministry-isa metetdaksü.

## NTC-i state sorkar dang Municipal Act reprangshitsü ayongzüker

Dimapur, March 26, 2023 (TYO): March 25, 2023 nü Nagaland Tribes Council (NTC) Executive aser Advisors senden amendang 2016 küm yanglushiba Nagaland Municipal Act 2001 onük benoka lemsatep aser idangji parnokisa sorkar dang tax aser reservation onüktem meyipa reprangshiang ta mepishitsü bangjemtepogo.

Nagaland nung alirtem aser kin hohotem o Civil Societies-i akhangba onüktem Nagaland state sorkari angashitsüla aser Act nungi timtem aliba onük ajak agentsü

ayongzüker, ta Media Cell, NTC sangdong ka nung metetdaksü.

Nagaland nung ULB elections agitsü renemer saka Municipal Act nung ashishitep onüktem lir, ta sangdong nung shia lir.

Nagaland ya teti anepalua aser mesüzüka dangbo malitsü aser state ka ama Nagaland ya asen rongsen ajanga pei sasa inyakteta litetba state ka akümtsüla. Anungji Nagaland nung alirtemi sorkar nem tax agütsüba yimya sübatsüla saka Constitution nung Arrla 371A ajanga Nagaland-i pei sobaliba dak

apetba ozüingtem yanglutsü temeten agütsür ta NTC-i ashi.

Asenok ama yimtenren aser ozüing temeten malirtemi yangluba Municipal Laws ajizüksü nungdak madoker. Anungji Nagaland Municipal Act 2001 nung tangar dang nungi ajizüka Sect 120 (1) (a) nung ali aser ki nung tax agitsü zülua aliba ya meyipa reprangshitsüla aser state sorkari "omission" & "deletion" olongtem amshia nübertem mesüzükba anentsüla, ta NTC-isa metetdaksü.

(Maneni tapak 2 nung...)

## Union Minister Verma-i Mon nung benjung lapoktsü

Dimapur, March 26, 2023 (TYO): Union Minister of state, DoNER & Co-operation Government of India B.L. Verma-i March 25, 2023 nü 3 buba Mon International Trade Fair & Expo 2023 tenziüksüogo.

Mon nung alirtemi B.L. Verma pelashishia agizük aser pai Konyak kin indang sobaliba takar ngua angudang kanga süingmang.

"Prime Minister aser Ministry of DoNER lenisüba kübok meta talang pilar aliba Mon amala tesem renlokdaüksütsü atema yaritsü" ta Verma-i ashi.

Mon Deputy Commissioner Ajit Kumar Verma, IAS-i Union Minister pelashishia agizük dang Ministry of DoNER ajanga iba sentong nung shilem agiba atema pelaba metetdaksü.

Anogo 15 nü benjung ya April 8, 2023 nü tembangtsü aser iba mapang shilem balala agitsü, ta paisa ashi.

Konyak Union President-ia Union Minister Verma aser pa den arur ajak dang pelaba metetdaksü.

Iba sentong nung Treasuries & Accounts, Art & Culture Advisor K. Konngam, Deputy

Commissioner, Mon Ajit Kumar Verma, IAS, Joint Secretary Anuradha S. Chagti, Under Secretary, DoNERN. Simte, Sekhar Dey, APS aser PA to Union Minister Alok Rai nung aden.

Minister of State B.L. Verma-isa Honibarnü Government Higher Secondary School Tizit indang ki tasen lapokja liasiü.

NIC Conference Hall, Mon nungi pai school ki lapoktsü. Iba mapatong ya Northeastern Council, MDoNER ajanga senotsü teyari agüja yanglu.

**HORTICULTURE - ONE OF THE MAJOR BACKBONES OF RURAL ECONOMY OF THE STATE. HORTICULTURAL CROPS LIKE NAGA KING CHILLY, NAGA TREE TOMATO, NAGA PINEAPPLE HAVE MADE THEIR MARKS IN THE GLOBAL COMMERCIAL MARKET.**

HORTICULTURE IS ONE OF THE FOCUS AREAS OF THE B20 MEET AT KOHIMA

**Nagaland B20 BUSINESS MEET**  
5<sup>TH</sup> APRIL 2023  
KOHIMA

# Govt. Higher Sec. School Tizit ki semzük



Minister of State, DoNER & Co-operation, Government of India, B.L. Verma ajanga March 25, 2023 nü virtual yimya nung Government Higher Secondary School Tizit, Mon tasenba semzüksüdang tangokba noksa nung angur.

**Dimapur, Metsüremi/March 26 (TYO):** Minister of State, DoNER & Co-operation, Government of India, B.L. Verma-i March 25, 2023 nü Government Higher Secondary School Tizit, Mon indang ki tasenba NIC Conference Hall, Mon nungi virtual yimya nung semzükja liasü, kong Advisor, Treasuries & Accounts, Art & Culture, Govt. of Nagaland, K. Konngam; Deputy Commissioner, Mon, Ajit Kumar Verma, IAS; Joint Secretary

Anuradha S. Chagti; Under Secretary, DoNER, N. Simte; APS, Sekhar Dey aser PA to Union Minister, Alok Rai nung dena liasü. Iba sentong nung KU, KNSK aser KSU tir tema dena liasü. Iba project ya Northeastern Council, Ministry of DoNER ajanga senotsü agüja liasü. Iba sentong nung tatsüka jembidang Verma-i Ministry of DoNER, Government of India indang nukla aser nukjidong

aser North-Eastern region nung ranglokba indang lemsatepa liasü. Government Higher Secondary School, Tizit semzüksüdang, Tizit Sub-division nung shisaliok renlokba nung iba school ki tasenba ajanga shilem tajung agitsü imlar, ta pai ashi. Tizt ya backward Block ka ama shimogo aser lenla ajaklen terenlok asoshi nungdakba mera ajak agitsü, ta paisa metetdakja liasü.

# Congress-i anir Assam nung 'Sankalp Satyagraha' ayongzükaga agi

**Guwahati, Metsüremi/March 26 (Agencies):** Lok Sabha züngsem nungi Rahul Gandhi anentsüba anema Assam Congress-i Deobarnü Guwahati nung "Sankalp Satyagraha" ayongzükaga liasü. Assam Congress tir Bhupen Kumar Borah, working president Rana Goswami, Assam assembly nung opposition leader Debabrata Saikia, deputy leader of opposition Rakibul Hussain, Chaygaon MLA Rekibuddin Ahmed nung temi anir Manabendra Sharma Complex, Guwahati nung iba sentong ayongzükaga liasü.

ashi. Raijor Dal indang general secretary Russell Hussain-i ashiba agi, "Onok Raijor Dal ya regional party ka lir aser Congress ya national party ka lir, saka BJP-i politics tenüng nung democracy samatsüba anema longkak aittsü asoshi onok yangi aru." "Manish Sisodia süang mesüra Akhil Gogoi-a süang, lenir shibasa BJP asoshi timtem kumdir, parnoki itemji ajemreptsü. Rahul Gandhi indang Bharat Jodo Yatra takok otsü agi Ato Kilonser Modi aoksa. Rahul Gandhi-i jembiba ya 2019 Parliamentary election nübuyim mapang liasü aser iba ya yimtenren tsütsü jembiba ka dang lir. Nisung balalai Lalit Modi, iba Modi, Narendra Modi nung ajak auer ta jembir, aser nia ashir. Onok ajaki jembur yur kechiba Rahul Gandhi anema dang Surat court nung ken o benok?" ta Hussain-i asüngdang.

"Constitution of India-i multi-party system bukumer. Rahul tai kechi ali? Pai Parliament session nung minute 50 jembiba aser idanggi Modi aser Adani nungeri nübur sen auya ta ashi," ta Assam Congress tekolakba Bhupen Kumar Borah-i osangbener dang ashi. "Rahul-i alima nung takartiba tem rongnung jenjang 600 buba nung liasüsang Adani-i linük nübur indang sen auyaa kum 6-8 tsüngta jenjang tanabuba tongtet. Parliament nung Rahul-i jembiba indang kuli agütsü aser iba yongji pa ola madok kumdaktsütsü atema BJP-i tasa ka yanglu. BJP tasa anema tanü asenoki linük tesem ajunga nung Sankalp Satyagraha tenzükogo," ta pai ashi.

"Ni lawyer aika den jembidangogo aser India nüjiso ngur kum 70 liyonga arudang dangar tenüng menüksüba mechi shinga kum ana tepuokdak yua mali. Nüjiso ngur aliba India indang puti otsü nung ibai mezüngbuba lir. Parnoki Parliament nungi Rahul Gandhi agiennüba ajanga yamai inyak, kechiaser Adani-Modi tasa tamajung temai adoktsütsü parnoki tsübo," ta Hussain-i ashi. "Tangbo onoki political party indang mejembir. Onok nukjidong ya Republic India kumzüksü asoshi lir aser iba atema party balala nung süaka onok adenshia lir. Onok külemi 2024 kum BJP yimsüsüba menden nungi atsüngdoktsü," ta paisa ashi.

Sankalp Satyagraha tetetzü opposition political party ajak lungjemtsü aser BJP-i Constitution anema inyakba anema raratsü. Rahul Gandhi nem MP menden meyipa magütsü tashi onoki raratsü, ta pai ashi. "Aruya aliba hopta ka tsüngta Assam nungi opposition party 12-i Guwahati nung lokti senden tulu ayongzüksü aser iba mapang onoki Republic of India aser Constitution kumzüksü atema ola adoktsü," ta Bora-i

MP nungi Rahul Gandhi züngsem agienba anema state tesem ajungalen Assam Congress-i longkak aita arur.

# Arunachal: Aluyimeri sorkar dang 10,000MW hydropower project agientsü ashi



10,000 MW hydropower project noksa nung angur.

aliba Bangladesh nung Kaptai Hydroelectric Project ajanga talidak maka kumdaktsü aser India nung jenoktsüsa akum. "Arunachal Pradesh nung tsünglanglen yimtsüngtem tzü agi mubangba aser tribal nisungtem talidak maka kumdaktsüba dang masü iba 10,000 MW project yagi kidanger Assam state nunga kongshitsü. Onoki iba tzünokdang tulu anema kum 13 rara arur aser tapi agi metoktsütsü," ta Pangkam-i ashi. Iba project atema mera magidang sorkari nübur den shisa agitepa nüburtem den jembishinü akatsüla asü, ta pai ashi. Pai anogo ishika tejakdang Nepal nung akaba United Nations Sought Asia Forum on Business and Human Rights nungi teyari meshia liasü aser India dang Siang project agientsü ajungshiang ta shia liasü. Ano yanglutsü aliba 2,880 MW Dibang Multipurpose Hydroelectric project tzünokdang ajanga timtem agütsütsü asadanga aliba miimshia ayuba atema IFAD züngsem Ebo Milli-i state sorkar aser NHPC aija liasü.

**Guwahati, Metsüremi/March 26 (Agencies):** Arunachal Pradesh nung lokti tentet anati state sorkar dang Siang ayong nung 10,000 MW hydropower project yanglutsü aliba agientsü ajungshia liasü. Iba project ya magienra longkak aittsü, ta aluyimer telok Siang Indigenous Farmers' Forum (SIFF) aser Indigenous Rights Advocacy Dibang (IRAD) ajanga ashi. Tibet nungi yima aluba Siang ayong ya tsünglanglen Assam kübok Tinsukia district nung Brahmaputra ayong kumtetba ayong asem rongnung ka lir.

State nung aliba nüburtem den junga mejembitepi Arunachal Pradesh sorkari National Hydropower Power Corporation (NHPC) den tzü nokdang tulu yanglutsü atema MoU zülutep, ta telok ana yagi tai tongloksür. "Siang River belt nung aliba Adi kin temi kodanga iba project tulu ya magizüksü, koba agi parnok aliba nung timtem agütsütsü aser parnok ali maka kumdaktsütsü," ta SIFF tir Tasik Pangkam-i ashi. Pai Chakma aser Hajong nüburtem athishia ashi, shirnok 1960s mapang tang

# Manipur nung arishi kum 17 tain kaketshir ka khasat

**Imphal, Metsüremi/March 26 (Agencies):** Manipur nung Kangpokpi district kübok mejangjaba nisung ana motorcycle nung mener arur arishi kum 17 tain kaketshir ka khasat, ta police temi Deobarnü ashi. Kaketshir ya Kangpokpi district kübok Motbung Public Health Centre jakdang Honibar aonung khasat. Iba lendong ya Honibar aonung 8:30 ako meta atalok, kong Class 12 nung azünger kaketshir Saigunlao Misao ya Motbung PHC nungi Motbung Model village nung par ki bushia aoba mapang 39 Imphal Dimapur National Highway nung lia khasat, ta police kati ashi. Nisung ana - tebur ka aser tetsür ka - motorcycle nung arua tesülen mena alisangi prangbong ka agitet aser S Misao yangji

khasat. Pa dak injang ana khaloktsü. Iba mapa tamajung inyakba sülen lendong agütsür ya motorcycle nungji Imphal tsütsü jena ao. Parnok aonung jena ao, ta police temi ashi. Iba sülen Motbung nung alirtemi longkak aita National Highway mokdang aser lenmang nung gari tyres rongka liasü. Kechi ajanga kaketshir ya tepsetar ano mejangja aser tasümgang ya post-mortem atema Kangpokpi district hospital nung bener oa lir. Iba tatalokba dak sendakba nung Manipur police ajanga ken o ka benoka lir aser bushisüngdang tenzükogo, ta police-i ashi. Tang tashi kija mesüra telok katia iba lendong asoshi tenüng agia mali.

# Ration cards alir nem medical teyari agütsütsü: Assam CM

**Guwahati, Metsüremi/March 26 (Agencies):** Ration cards aliba kibongtem nem sen lakh pongu alang angadi medical services agütsütsü, ta Assam Chief Minister Himanta Biswa Sarma-i March 26, 2023 nü sangdong. CM Sarma-i iba osang ya

Rangia semdangba mapang sangdonga liasü, kong pai sen crore 545.19 jenjang project balala atema nüngshilong azüngja liasü. "Ration cards aliba kibongtem Pradhan Mantri Ayushman Bharat Scheme aser Mukhya Mantri

Ayushman Bharat Scheme kübok joki kum shia sen lakh 5 tashi medical treatment angati angutsü," ta Sarma-i iba sentong nung ashi. Ration cards maliba kibongtem nem taküm asoshi iba teyari agütsütsü, ta paisa ashi.

# NTC-i state sorkar dang Municipal... (TAPAK 1 NUNGI...)

"Sec. 23B Reservation of offices of Chairpersons in Municipalities for SCs, STs, and Women" nung municipalities nung tetsürtem nem menden lemmzüksüba den putepa Chairpersons indang office ya Scheduled Tribes and Women nem lemmzüksütsü (Amendment Act 2016 nung Scheduled Castes omitted sayua lir) aser ibala mapa ya melentepa inyaktsü ta shia lir. Iba section nung Chairpersons atema tetsürtem

nem shilem lemmzüksüba ya 'reservation upon reservation' lir. Tetsür nem 33% lemmzüksü Chairperson menden asoshi reservation madak reservation yabo mebilemdangi lemmtetba ka lir aser mapa küma inyaka moutettsü ta NTC-isa metetdaktsüogo. Nagaland ya Scheduled Tribe State ka lir aser Scheduled Caste tribe mali anungji NMA 2001 nungi 'Scheduled Caste' olung ajunga agientsüla, ta NTC-isa ashi.



New Delhi, March 26, 2023: Congress lenir, Rahul Gandhi Lok Sabha nungi anentsüba anema Amongnü Congress Tir, Mallikarjun Kharge den party lenirtem- Priyanka Gandhi, K. C. Venugopal, Pawan Bansal aser party nung inyakertemi mener longkak aitba noksa nung angur.

### PM Modi-i nüburtedang temang shilem tenlatsü ajungshi

**New Delhi, Metsüremi/ March 26 (Agencies):** Amongnü Ato kilonser, Narendra Modi-i nüburtedang pei temang shilem tenlatsü ajungshia, nisung kati sür temang shilem tenlaba ajanga nisung 8-9 taküm lidaktsütsü akok, ta ashi.

Paisa, temang shilem tenlaba inyakim tezübaba akümtsü aser temang shilem tenlatsü ajungshitsü atema sorkari inyakim ka renemdar, ta metetdaksü.

'Mann ki Baat' radio sentong ajanga nüburtedang den jembidang Modi-i, temang shilem tenlartemji tagizükertem atema tsüngrem mesüka lir; temang shilem tenlatsü melungtetba ajanga taküm aika kümzüktetsü, ta ashi.

"Tang linük nung temang shilem tenlaba indang

awareness agütsüba kanga bulua akümba ajanga melung süa bilemer," ta Ato kilonseri ashi.

Temang shilem tenlatsüpurtemji arrshi küm 65 ser tekübokpurtem asütsüla, ta lateta aliba-a agienadokogo, ta pai metetdaksü.

2013 küm linük nung temang shilem tenlabaji 5,000 dang nungi tajemba liasü, ajisüaka 2022 küm nungbo temang shilem tenlabaji 15,000 dang nungi teimba liasü, ta pai ashi.

Nisung kati asüba sülen temang shilem tenlaba ajanga nisung 8-9 yaritettsü, ta pai ashi.

Ato kilonserisa süadokba sülen temang shilem tenlatsü nangzüker kibong züngsemtem den-a jembi; parnok rongnung Amritsar yimti nung aliba apuani densema lir. Par jala ka asoba sülen anogo 39buba nung

süadokba sülen tenati tena asüba sülen temang shilem tenla agütsütsü melungteta liasü.

Parnok nem tenüngsang agüja Modi-i, "Parnok ama tenla agütsürtemi taküm nung kechi tongtibangtiba, ibaji asenok nem angatetdaksür. Taküm anema alitsü atema nisung aikati temang shilem tenlatsüpurtem atadar. Temang shilem tenlaba tezübaba akümtsü aser ibaji ajungshitsü atema linük nung inyakim ka dang asütsü atema sorkari inyakdar," ta ashi.

Modi-isa, tang linük tesem kar nungbo coronavirus kanga prokdar, anungji nüburtemi kanga kumdanga alitsüla, ta metetdaksü.

Ato kilonserisa, solar energy sector nung linük tejakleni aoba aser lenla balala nung tetsürtemi shilem tajung agiba indang lemsatepa liasü.

### National party temi regional party tem yaritsüla: Akhilesh Yadav

**Lucknow, March 26 (Agencies):** Congress party nem osang ka sangoktsür ama Amongnü Samajwadi Party (SP) tongti lenir, Akhilesh Yadav-i, BJP anema raratsü atema state balala nung national party temi regional party tem nungita yaritsüla, ta ashi.

Anogo ka tejaklen Bihar deputy chief minister aser RJD lenir, Tejashwi Yadav-ia, opposition party tulutibaji Congress party lir, ajisüaka sangküm Lok Sabha election nung BJP anema tokteptsü atema regional party tem tashi itta aliba state tem nungbo regional party temjii tongti südaksütsüla, ta jembia liasü.

Congress lenir, Rahul Gandhi Lok Sabha nungi anentsüba dak sendakba nung

tasüngdangba ka langzüdang taoba mapang Uttar Pradesh chief minister, Akhilesh Yadav-i, Congress-i ibaji anema 'satyagraha' ayongzüka agiba atema dang tenüngsang agütsü.

Akhilesh Yadav-i, "Tanübo CBI, Enforcement Directorate (ED) aser Income Tax-i regional party tem anema inyaker. Netaji (Mulayam Singh Yadav) süaka, Lalu Prasad Yadav, Jayalalithaa, Stalin, KCR mesüra Delhi nung Aam Aadmi Party süaka Centre nung aliba party temi parnok ajak anema inyaker," ta aitsü.

Opposition teloktep dak sendakba nung tasüngdangba ka langzüdang pai, "Teloktep yanglutsüji onok mapa masü. Onok mapaji teloktep den amalitepa alitsü dang lir," ta ashi.



March 26, 2023 nü Shimla nung Himachal Pradesh Chief Minister, Sukhvinder Singh Sukhu asoba anogomong nung pai cake rangsaba noksa nung angur. Amongnü pa arrshi küm 59 jungogo.

### Rahul anentsüba ajanga Congress party tashi itshitsü: P Chidambaram

**Kolkata, March 26 (Agencies):** Amongnü taoba mapang Union finance minister aser Congress party lenir, P Chidambaram-i, party lenir Rahul Gandhi Lok Sabha nungi anentsüba ajanga Congress party tashi itshitsü, ta metetdaksü.

Interview ka nung jembidang Chidambaram-i, ruling BJP-i tongti süa Congress anema inyaker, aser regional party tem melamela azüoktsü atema Congress samatsüner, ta ashi.

Ajisüaka Congress party mesamatsü aser regional party temi nokdaker BJP anema raratsü, ta paisa metetdaksü.

Tenüng menüktsüba ken o ka nung court kati Rahul Gandhi aitsüba sülen Rahul Gandhi Lok Sabha nungi anentsüba dak sendakba nung tasüngdangba ka langzüdang Chidambaram-i, "Linük ya 'emergency' mesükba tensa ka nung lir. Taoba mapang linük emergency nung press temeden agiena liasü. Tanüa kecha balaka masü. Tanübo osangbenertem aser media jurila tashi mamshiteter. BJP-i tongti süa Congress anema inyaker. Parnoki Congress party samatsütetsü aser ibaji ajanga regional mesüra state party tem melamela azüoktetsü ta bilemer, ajisüaka ibaji tai. Congress party mesamatsütetsü aser regional mesüra state party temi

nokdaker raratsü," ta ashi.

Tang Rahul Gandhi dak atalokba ajanga 2024 küm election atema Congress jenjang ajungtsü asü?, ta asüngdangba langzüdang pai, "Tesüba anogo ishika tsüngda tatalokbatem ajanga party tashi itshiogo. Onoki tashi tuluka anema rarar, ta onoki meteta dang lir. BJP anema raraba, telongjem aser tenlaba ajanga Congress party tashi itshitsü. Taruba election atema Congress tashi itshibaji tongti tashi ka asütsü," ta ashi.

Congress nung lenir tain ka ama nai tang mapang nung Rahul Gandhi dang kechi sayutsünger?, ta asüngdangba langzüdang pai, "Pai (Rahul Gandhi) kü sayutsünger menügdaker aser ni pa sayutsünger masür. Pa tasü tait aser pa dak tetsübu mali. Bharat Jodo Yatra mapang nung pai pa dak aliba tashi aser temelungtetba sayuogo," ta ashi.

Sangküm Lok Sabha election nung regional party temi tongti shilem agitsü asü?, ta asüngdangba langzüdang pai, "Linük federal inyakim nung regional party temji kanga tongtibang. Atangji regional party aika aliba aser takok anguba ajanga India nung yimtenrenji federal ta sayur. 2024 Lok Sabha elections nung regional party temi tongtibang shilem agitsü, ta ni bilemer," ta metetdaksü.

### India-i Canada high commissioner jaok

**New Delhi, March 26 (Agencies):** Tawa Canada nung Khalistan pusemertemi India nung diplomatic mission aser consulates anema inyakba atema India sorkari New Delhi nung Canada high commissioner jaoka tebilemetsü onük lemsatepogo.

Ministry of External Affairs (MEA)-i sangdong ka ajanga, police liaka Canada nung security alema India nung diplomatic mission aser consulates alema inyakba tebilemetsü onük balala Canada high commissioner den lemsatepogo, ta metetdaksü.

India-i Canada dang Vienna

Convention kübok telatetbatem shidak inyaktsü aser item tatalokba nung tang tashi nung maitsü jangjartem pua temerenshi agütsütsüla, ta takhangba agütsüogo.

Canada sorkari tim teinyaktsü inyakba India ketdangsertemi missions aser consulates nung mapa shidak inyaktsü atema parnok nem security agütsütsü imlar, ta MEA-i metetdaksü.

Taoba Amongnü (March 19) British Columbia province nung Indian envoy to Canada sentong ka nung adentsü liasü, ajisüaka Khalistan pusemertemi sashia longkak aitba ajanga

security tsütsü tebilemetsü kaa sentong thinen.

Iba sentongji Taj Park Convention Centre Surrey nung ayongzüka liasü aser iba sentong nungji high commissioner of India, Sanjay Kumar Verma agizüktsü renema liasü.

Khalistani pusemertemi longkak aitba tesem nungjisa Indian Indian-origin journalist, Sameer Kaushal dak-a azük.

Tawa Canada nung Khalistan pusemertemi India anema inyakba tatalokbatem kanga bulua kumdard. Khalistan pusemertemisa Hindu nung tekülem ki-a aika maakogo.



March 26, 2023 nü Reasi district nung Union Railways Minister, Ashwini Vaishnav-i Chenab Bridge semdangba mapang tangokba noksa nung angur. Chenab apu ya alima nung railway apu tematiba lir. Indian railways' Udhampur-Srinagar-Baramulla Railway Link (USBRL) project kübok iba apu yangluogo.



## TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 27, 2022

### Majung asükba lenirtem

**2**019 küm Rahul Gandhi-i Narendra Modi dena Modi ta ajaba nisungbo ajak auer asütsü amai atalaja jembiba ken o nung Surat court nung obendangeri pa aija küm ana tepuokdak ayutsü obendang agütsüba ajanga ano, pa Lok sabha nungi tatar menden nungi agienba tatalokbatem ya meimbala osang ka lir. Iba tatalokba yagi teti atema India nung yimten yimsüsür aser obendangerem taküm nung temelenshi tajung ka bener arutsü imlar. Rahul Gandhi-i Modi ta ajaba nisungtem dang auer jaa aitsüba aser menüja jembiba o nungji tai mesüra shitak ta mashir mesüra Surat okadak obendangeritemi obendang agütsüba nungjia kecha meshili, item ken o temji ano maneni tejembitsü purtemi temaba okadak jembiyonga aotsü anendaka lir, idangji asenoki metettsü. Ajisüaka, iba tatalokba yagi asenok ajak nem teshisadangtsü o kar bener arutsübaji, yimten yimsüsürtem asoshi tejembitsü aser teinyaktsü o ajunga agi nübortem tsüngdang tangar majung asütsüba ya dang asü ? Mesüra tangar kisüng aija jembitsübajiang yimten yimsüsürtem asoshi tongtibang teinyaktsü mapa asü (?) ta bilemetsüa linük nung yimsüsürtemi jembiba o tem ya asütsü. Aji oda, külen Narendra Modi aser Amit Shah nungertemi anir Congress nung lenirtem tasürtema dena aija jembir aser ano Congress nung alir lenirtemia taolen ajak nung BJP lenirtem aija jembir ta yimten o jembirtem ajaki pei nübortem nem tepelatsü aser teimla osang tajung ka agütsür masü saka kati ka sempadaksütsüsa kasa linük aser kasa sensosangertem rongnung miim tamajung enoka toktsür. India atema lendongji aji asütsü. Aji oda, India nung yimten telok balala nungi yimsüsürtem rongnung kati ka aija aser atalaja jembiba o tem ya kodang bilemdangdir, India asoshi tsükchirji China aser Pakistan masü saka India nung telok kati telok ka sempatsüsa aitsütepba ajanga India asoshi tsükchirji India nungertem kümdaktsür. Atangji, nübortemi mulungba nung yimsüsürtem shima yimten akümba lima nung yimten nung yimsüsürtem mita anidaktsübaji kanga tongtibang aser yimsüsürtemi aibelendang tuteta aija metongshitsütsübaji kanga tenüngdaktsü. Iba jagi tatar senden nung opposition alitsü nüngdakba indang asenok rongnunga jembir. Aji oda, tai dang tai ta shia tai inyakterem aitsübaji tim dang, ibajia alima yangluba mapa tongtibang rongnung ka lir. Ajisüaka, Germany nung Hitler-i Yihuda nung sempadaksütsü nükjidong nung taolen ajak nung tejembir ajaki nübortem tsüngdang tiyazü o agia Yihuda nung majung, Yihuda nung majung jembiba agi, tai agi shitak kümer Germany nungertemi Yihuda nung sempatsü tenzükdaktsü ama, India nungertem rongnung kati ka sempadaksütsüsa taolen ajak nung yimten lenirtemi taküm ali malir ajak indang tamajung, tamajung dang jembia jajara, iba jagi India mesüngjemettsü aser longjemtsü melen loksaa aotsü. Ibaji mesük Nagaland nunga yimten lenir kari taolen ajak nung kar majungsa jembira, shitakba nung iba kin aser nisungji ajaki sempatsü aser Naga nung rongnung meputep tenzüksü. Aji oda, tanü asenok Naga nung lokti aser yimten senden nunga alima ajungtsü atema temetetba aser shisa tasen (new innovative ideas) benoka jembitsü melen kari kar aitsür aser kari kar atalatsür ta kisüng taolen ajak nung jembira, iba nung jagi nübortem kechi ajangzüksü ? Iba jagi nisung mulung dang menendaktsür. Joko, India nung dang masü asen Naga lima nunga kati ka aitsütepa jembiba agi lakogo aser itemji azüi azü dak asanger amai dang lir. Joko, asen lima ajungtsü asoshi pei tai nembangtsü mechi tangar tai apuba jakla tamajung ya endoker, kechi tai ta masü kechi shitak aser kechi tajung, itemji shisateta jembidi. Tangar aitsütsüba yabo ajaki inyaktettsü, saka tangari meinyaktetba mapa inyaktsübaji dang asenok atema tongtibang asütsü. Joko, tangar majung kisüng asükba lenirtem masü saka tangar dang nungi tajungba aser ochi tashiba inyaktetba lenir asütsü India nunga aser Nagaland nunga yimten yimsüsürtem rongnung ajungshitepa merangteptsü kanga nüngdak kümogo.

## OLEMSABANG

### NI TARUTSÜ NAGA NUNGER TIA NGUA NÜKTZÜ YIMA ZÜLUR

~ SM. Meren, Ex.Pastor Ungma

(Yashi adok nungi...)

29 March 1953 nung P.M. Nehru arudang Kohima nung atalokba. India P.M. Nehru den Burma P.M. tena külemi Imphal nungi Kohima pungteta aru, idangji Naga kin ajak nungi teshimtet nübu aika atenshia pa nem Memorandum ka agütsütsü asoshi aji zülua bener ata liasü, saka lenmang nung tsüngsak tulu aru, anungji iba jagi tenaji kanga timtema Kohima pungtet aser tenaji tamasa Kohima yimtiba nung agizüksü renema liasü, anungji renemba ama idakji tenaji agizük aser tamasa tena nem sungu tajung renema bener aiür tajung teshimtet kati arua iba sunguji agütsü, saka tia maka P.M.Nehru nem agütsüba aina marok sungji ali nung longzüka tsük aser marokji jaksaa sungoji ajak yimtoka maksü ajuru. Iba mapang nungjisa tena Imphal nungi adokdang tsüngsak ajurua atokba to ano maneni parnok alidakji aon, aser iba tsüngsak jagi Burma P.M. meyong Nisan ajak shizüka bener oa adok, yamaji ajurua alidang India P.M.Nehru o jembitsü tenzük, saka iba mapang nung Kohima DC Bargudokhei linük tenzüker shinga P.M. den majurutepdaktsütsü ta ser nokdang, anungji linük tenzüker ajak P.M. o jembiba mapang nung pa o-ji mangatsü ta ser senzüka ao aser iba sülen nübortema ajak oma, anungji P.M-i teka agi ayipa aja saka shinga meyipa maru ta yamaji tamakok angu. Iba tamakok ajuruba atema Kohima D.C. maksü angu aser pa transfer yok.

Ano Oct.23.1982 anogo nung India P.M. Indira Gandhi Mokokchung semdangi aru aser Mokokchung public ground nung agizüka Lai o jembidi tenzükdang anülulen nungi yipru tulu ka aru aser iba yipru tsüngsak jagi nübör kata ground nung nokdaka melitet senshidaktsü, aser mepet temelem tulu agi ground nembang nung shingaia laji majitet aser nübortem ajak senshi aser laia o junga aser tebilemba meshiteti atem, aji dang masü tia maka iba anogo nungji Ungma nung tambur ka Public ground teküpoklen alu nung süngdong nungi tsüka asüba atalok. Iba anogojia Jatra majung ajuru. Yamaji Naga nung lenirtem den India P.M. junga majuruteptetba jatra tamajungji mapang shia ajurua aruba tanü tashi yamaji lir. Aser ajuruteptsüjibo yutsür 1954 nungi India nungertemi Assam police ajioktsür Naga nung yim ajak rongdokja, yimdaklir ajunga pua azükba agi taküm jenti tasüba ajuru aser tepuokdak jenti putena shibanga merenshia arubaji asen kidanger Assam police ajanga tenzük, aser iba sülen India Armytemi kangshitsü tenzük, yamaji tebang agi rasaa meshitettsüsa asenok kangshia tepseta aruba yong maremteti India nung den NBCC ajanga yimjung o lemtepe aser 1964 Sept 6 nung asenok tsüngta yimjung yangluogo, saka yimjung yangluba dak alaka Naga yimden jembia marutet aser Naga nung tebilemba matalok anungji State nung MLA 60 NNO 48 aser Democratic party nung MLA 12 liasü, ajakji longjema jembir MLA ajak anendi aser Center den Naga yimden indang tekaraba nung jembidi ta ajaki mulunga agizüka jembir Democratic party tama jembiba ama pei pei menden toktsüdi ta lemteter Democratic party tama pei menden toktsüogo, saka ashikelaka NNO teloki pei menden metoktsü aser Democratic menden atema tang by-Election ayongzük aser menden 14 prongla NNO-i takok angu nungji opposition maliba Government yanglua parnoki mulungba inyaka bener ao. Ajioda Naga nungeri Naga nung ajak ashioktsür aküm, aser Naga yimdenji tesülen toktsü. Anungji iba jagi Naga nung State nung lenirtemi Naga yimden meima mali ta sayu.

Ano Tang taoba NDPP Sorkari anir Naga yimden takok ngua melemtet tashi Election magitsü aser kecha party nunga candidate nema ticket magütsütsü aser malemetsü aser Naga yimden-ang takok ngua lemtetra onok tang teinyakdak MLA temi menden toktsütsü ta akangakanga jembia nangzük, saka reprangang Naga yimdenbo tezülen yutsür candidate ajak ticket raktepa Election agiogo, tetenzük nungi tanü tashi Nagaland State lenirtemi Naga nung kwiben ashioktsütsü? tsürabur mapangbo Naga nung ajak sabang ka nung zep ta longjumer tebang ka nungi adoker ama süaka kümaka meyazütsü aser mejenshitsü ta hai ta nangzükteper Naga yimden tenzük, aser iba maangka nungji 1963 nung State angu aser tanü Naga lanur aika idakji chubar, sürabang tanü State yimden lenirtemi taoba Naga yimdenji meteta lir mali ser Naga lima nung yimsü asür?

(Maneni taruba adok nung...)

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir

## Impur nung IBS Alumni Refresher Course takok ngua agiogo



**Impur, March 26 (TYO):** Mapang talangka nungi sarasadema ataba ama Impur Bible School nung renemer Arogo balala nung mapa teinyakdakpur parnok nisung 30 tashi March 7-24, 2023 anogotem nung Impur nung IBS Alumni Refresher Course takok nung tembangogo, ta Impur Bible Seminary nung Principal, Imtila Longkümer-i sangdong ka nung metetdaksü.

Tamalen inyakba ama mesüi taküm iba sentong ya kanga dang mapang agia angazükshiba (intensive refresher course) mapang ka liasü. Iba sentong nung IBS nung tesayurtem, ABAM

Executive Secretary Rev. Dr. Mar Pongener, Tekatemjen, Youth Co-ordinator; Impur Arogo Pastor Dr. Akok Amer; Temsüla Aier aser Rev. Toshi Longchar nung er ajanga onük balala nung tesayuba agüja liasü.

Iba training nung anüdoklen Nagaland kintem, Assam, Arunachal aser Myanmar nungi teshimtet dena liasü. Training nung adener ajaki kanga dang temulung süa adenba aser tarutsü nunga iba amala sentong akatsü parnoki lemsatepa liasü.

Ano kanga dang temoatsü anguba mapang kaji, iba sentong agiba mapang IBS Foundation anogo ajurua

March 24 nü Rev. Dr. Mar Pongener, Executive Secretary, ABAM tongti o jembir jaoka IBS alumni den külemi Ministry balala nung Secretary den staff tem, Impur Arogo nung tenzükertem, CMHSS Principal, ICH Nursing School nungi dena kanga dang temoatsü ngua agiogo, ta kasa sangdong nung shia lir.

Tatem nung ABAM ajanga iba sentong tulu katettsüsa rongsen aser nübo agüja yariba asoshi Impur Bible Seminary nung inyakertemi kanga dang pelaba iba osang ajanga lemsateper. Tarutsü nunga iba ama sentong katettsüsa Tsüngremi lenmang lapokjangma ta sarasademer.

## Uganda nung Muslim nungertemi pastor aser jabaso na dak azük

**Nairobi (Kenya), March 26 (Agencies):** March 15, 2023 nü anüdoklen Uganda nung Muslim yimsü alia amangertemi pastor ka aser par jabaso (arrshi küm 14) na dak mejungi azük; Tenla kidang aonung piyong sarasadem sentong agitsü atema renemba mapang nung Muslim nungertemi tena dak azük, ta osang ka ajanga metetdaksü.

Mayuge District kübok Kigulu yimdak aliba Tenla kidang aonung 8:00 ako meta Islam yimsü alia amangertemi arrshi küm 35, pastor John Balidawa aser par jabaso na dak azükba sülen tenaprongla hospital-i anir ao.

Pastor Balidawa aser par jabaso Gilbert Sanja na Ebenezer Christian Center nung sarasadem sentong agitsü atema renemba mapang nung nisung kari kilem nung lung agi aonba ola tenati angashia liasü. Iba sülen Sheikh Shafi Mukama leniba nung Muslim nungertem Tenla ki telung jagi aitr, aser pastor o jabaso na dang oadokang, ta tuyua liasü.

Osangbener den jembidang pastor-i, "Parnoki tuyuba ama ni tashi mangaba agi sheikh den tangar anati kü tejak nung ama, iba sülen kü dak nungloksür kü dak ajemshi. Tangartem jagi ozü jabaso dak azük. Tsüngrem taochi ajanga jabaso küna tasü nungi kümzükogo," ta metetdaksü.

Parnoki pastor aser jabaso na dak taochi makai azükba ajanga tenaprongla süchia ao, aser Buluuba nung aliba hospital ka nung shia arudang ang tena anasa arrshi küm 39 pastor Gerald Kato Wakabi liasü.

Muslim nungertem jagi Pastor Balidawa indang mobile phones den Tenla ki aser Tenla kidang aliba menden 70 shi raksatsüogo.

Pastor Balidawa tetsüng sükdang, teka külen teret sükdang, tejak awak aser tebok den dar yirua liasü, ta Pastor Wakabi-i metetdaksü. Pastor Balidawa'er jabaso tenütsü nung zübo tulu keta yiru aser teka achichilen teret sükdanga liasü.

Pastor Wakabi-i ashiba agi, March 16 nü pai Tenla ki anasaji shidi ka zülur lia angu aser shidi nungji yamai zülua liasü- "Joko iba tesem nung Tenla ki malitsü. Iba tesem ya Allah tsüngrem dang külemtsü atema temeshi tesem lir."

Yaküm August ita nunga Mukama-i Wakabi amokmerena shidi ka zülua liasü; shidi nungji "Nai nenok Tenla ki aienshitsu, kechiyong onoki ozü züngsemtem Khristan yimsü dangi meyipbaji repranga dangbo meyuetsütsü," ta shia liasü.

Pastor Wakabi-i, "Tang iba tatalokba ajanga tamangertem aika tsübuadokogo, ajisüaka parnok tenela nung tanaben asentenshitsu, ta ni amanger,"

ta ashi.

Iba Arogo ya yaküm January ita nung ang tenzüka liasü aser tang tashi nung Islam yimsü toktsür Khrista agizüker parnok 12 densema Arogo nung züngsem 47 liasü, ajisüaka Tenla ki raksatsüba ajanga tangbo parnok telok ishika lemsar kidang dang tekülem sentong agir.

Arogoi jila nung aliba mosque tesem nungi kilometer 30 shi pilar aliba tesem ka nung Tenla ki tasen asütsü tebilemba lir, ta Pastor Wakabi-i metetdaksü.

## ANO GO ABEN TSÜNGREM DEN

### Nai Kechi Angur Aji Na Kümang - (T.Ken 119:33-40)

Nai kechi angur iba jagi na kechi akümtsü aji bentettsür. Nai kechi angur iba jagi na kechi asütsü iba nung yarir. Anungji nai kechi repranger kümdanga reprangtsüla. Ken züluri sarasademba nung kecha tesüngmangtsü mali. "Amajok reprangba nungi kü tenüktem meyipa odakjang, aser ne lemantem nung ni saksalema kümdakjang" (t.37). amajok tetezü jenjang maka. Anogo shia asenoki TV nung kechi angur timba jenjang makabatem lir. Ibaji Tsüngrem nungi aruba masü saka satan aser alima nungi aruba lir. Aser ibaji amongtema malir, ajak amajok. Amajok tetezü tazünglapuja nung kecha malir.

Tsüngrem O nung reprangang, ibai ochi lir. Ibai Tsüngremer rongsen. Ibai amungtema alitsü. "O Kibuba, teti tatem maka, ne O kotak nung akanga noktaka lir" (t.89). Kodang Tsüngrem O agi asenok sünga lidir asenoki amajok den rarar. Kodang asenoki Laishiba tapu dangi asenok tenük meyipdir, asenok ochi aser jenjang akaba nung ainer aser teti tatem maka taküm den sendaktepa alir. Asenoki TV nung noksa tapu balala repranger aser iba jagi taküm nung timtem madokdaksür ta ashir saka tenük agi kechi angur aji tekoloki aier aser iba jagi temulungjang nung mapa inyaker, aser na jenjang makaba taküm kümdaktsür. Laishibai asenok dang ashir, "Shibai Tsüngremi mulungba inyaker pa teti tatem makai alitsü" (1Yn. 2:17).

Alima kechi agütsür aji atamata, tiyazü aser jenjang makaba lir. Alima kimong nung ne taküm kimong teyanglu. Iba melen teti taküm makai alitsü Tsüngremer O nung ne taküm kimong yangerang.

## Impur nung Deacon training agiogo



**Impur, Metsüremi/March 26 (TYO):** ABAM Church & Mission ajanga ayongzükkaa ABAM Zone 1 & 2 Arogotem nung aliba Deacon tem asoshi Deacon training March 24 & 25 anogotem nung Impur nung takok ngua agiogo, ta ABAM Executive Secretary, Rev. Dr. Mar Pongener-i sangdong ka nung metetdaksü.

Ajak agi Arogo 40 aser

Fellowship ana nungi Deacon Fellowship ana nungi Deacon 196 arua iba training nung aden.

Training mapang shisalen sayurtem aser onüktem yamai liasü; Rev. Dr. Mar Pongener, Executive Secretary, ABAM ajanga 'Tanü Mungdang aser Lim Arogo' onük jembia, Rev. Dr. Temsü S. Pastor Alempang Baptist Arogo ajanga 'Baptist Arogo Yimsüsüba, Arogo aser

Yimten Tesendaktep aser Tepila' onük jembia aser Rev. L. Yapang Mollier Secretary, Church & Mission ABAM ajanga 'Baptist Distinctive' onük jembia liasü.

Maneni iba sentong agiyonga aodang Tsüngrem taochi ajanga temoatsü nung aniangma ta sarasademer, ta kasa sangdong ajanga lemsatep.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Pezü**

(n) angmerem o angnen na sütepa angüsü.

Ibai tanur sor anogo asem nü buba nung teberem nung mesüloktür.  
(ritualistic waistband for new born baby made of red and blue twisted threads)

\*Khristan yimsü arurbo **pezü** ya mamshir.

**Pezübelem**

(adj) temang ayangashi, kanga meilongi (body ache, lethargy)

\* Kü temang nung pezübelem timtem aliba agi mapa nunga kanga **pezübelemer**.

**OLONG PAITEP # 6468**

|    |  |   |    |    |  |    |   |    |   |
|----|--|---|----|----|--|----|---|----|---|
| 1  |  | 2 |    | 3  |  | 4  | 5 |    |   |
|    |  |   |    |    |  |    |   |    |   |
|    |  |   |    | 6  |  |    |   |    | 7 |
|    |  | 8 |    |    |  |    |   |    |   |
| 9  |  |   |    | 10 |  | 11 |   |    |   |
|    |  |   |    |    |  |    |   |    |   |
|    |  |   | 12 |    |  |    |   | 13 |   |
|    |  |   |    |    |  |    |   |    |   |
|    |  |   |    |    |  | 14 |   |    |   |
|    |  |   |    |    |  |    |   |    |   |
| 16 |  |   |    |    |  | 17 |   |    |   |

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S\_ \_ \_ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong talemangliba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

**OLONG PAITEP # 6467 TELANGZÜBA**

**TIPIEN :**

- 1. Tesüngjem, 5. Tetemsü,
- 6. Oro, 7. Anüshi, 8. Rür, 9. Ozü,
- 11. Lemjem, 14. Anü,
- 15. Lungkak, 16. Ashikülak

**LANGTSÜNGLEN :**

- 2. Entsü, 3. Mersü, 4. Otia,
- 10. Zünga, 12. Jakla, 13. Maka



**ULBELECTIONATEMA SHISATOKDEN**

**Alokba** : Sir...Ya tawa tanü Municipal & Town Council Election agitsüba kanga bulua jembir...Ya shitakba agitettsü...??? Onoki ozü lima ozü District nungbo khenyongi magidakttsü ako-di.

**Osang Zülur** : Ena...Nenek kangarabo tekong temerang nooo...Taoba mapang nungbo Sorkari dang ozüng agütsü ako.... Saka tangbo Supreme Court ozüng agi sangdonger ako.... Subreme Court ozüng alema shinga-ia nunga ta meshitettsü ako....Ashiko, Indian Parliament jagia nunga ta meshitettsü sudi...Anungji kechi temetongshitsüla liasü aji metongshiogo/aitokogo ta sülaji...Odang agiang.

**Alokba** : Ayyyeee...Surabangla oda kanga tekong memerangi khen kanga junga shisadanglaabaaa.

**Osang Zülur** : Hau-ja...Nenoki komar'ka tekong merangyongjia makoktsü sudi. Anungji nenok tangar agiba temoatsü magiba-ang takoksa asüja.

- Lilir : L. Kika pongener

**Guwahati nung lisopurtemi sobaliba wazüktsü atema lungkak ait**



**Guwahati, March 26, 2023**

**(Agencies):** Assam nung kin balala nungi nisung meyirjang Deobarnü Guwahati nung adenshi aser parnok sobaliba kümzüka ayutsü atema takhangba agütsü.

Assam kübok district 30 nungi Bodo, Rabha, Mishing, Dimasa, Tiwa, Karbi, tea tribe aser Sonowal-Kachari nungertem Chalo Dispur' programme nung

aden ta sentong ayonger Janajati Dharma Sangskriti Suraksha Manch (JDSSM)-i metetdakttsü.

Onok tim masüba inyakyim agi tamangba yimsü melener aser iba ajanga nübertemi sobaliba, oshi aser külemküjaba toktsür ta JDSSM-i ashi.

Scheduled Tribe (ST) nunger tanga tamangba yimsü agi melener aser pei sobaliba, inyaksangshi, külemküja

toktsürtem ST list nungi agientsüla ta parnoki takhangba agütsü.

"Onoki Assam governor ajanga President aser Prime Minister dangi memorandum yoktsü" ta parnokisa ashi.

Deobarnü Chalo Dispur' programme nung adenertemi pei pei sobaliba sübotsü agir shilemagi aser sobaliba yartsüngangertem telok 10 temai tsüngsang.

**Imphal West nung tiyazü bomb osang ajanga petsaprongtep**

**Imphal, March 26, 2023**

**(Agencies):** Manipur nung Deobarnü Imphal West district nung bomb osang ka ajanga nisungtem kanga dang aoksatepogo.

Bamdiyar Machin Manao tenemtsünglen bomb ka yuja lir ta WhatsApp osang ka Manipur police dangi yoka liasü.

Iba osang angashili Manipur police indang bomb disposal squad, criminal investigation department (CID) aser Nambol

police station ketdangsürtem tesem tonga ao.

Deobarnep 7:30 ako meta Manipur police-i iba osang angazük. Manipur nung telungpur telok ka tesepe anasa bomb yutsüba osang ajanga nisungtemkanga aoksatepa liasü.

Nambol police station kübok Bamdiyar lenmang anasa bomb yutsüba ajanga iba temeket nung alirtemkidang nungi malu. Police-i iba bomb raksa endoktsü atema tesem ajunga meketbang.

Ajisüaka, Manipur police nungi mongintemi package ji ngur lapoka repringdang tiyazü osang prokshiba putet.

Manipur police-i pongdangji lapoker repringdang lungro ka dang enoka liasü. Nisung kari pongdang ka anguba sülen bomb enoka alitsü ama temulung melemi bilem.

Deobar March 26, 2023 nü People's Revolutionary Party of Kangleipak, (PREPAK)-i 43 buba Red Army Uprising Day among.

**Assam CM Sarma-i KLO dang tashiyim agi sen mesarutsü amokmerener**

**Guwahati, March 26, 2023**

**(Agencies):** Kamtapur Liberation Organization (KLO) nem tashiyim agi sen magütsütsüla ta Deobarnü Assam Chief Minister Himanta Biswa Sarma-i metetdakttsü.

KLO ya ozüngi noktangba telungpur telok ka lir aser parnoki Kokrajhar nung shishilembartem dang Rs. 5 lakh meshi.

"Assam state police, sorkar aser ni ibala tashiyim agi meshiba sen magütsütsü atema inyaker" ta Chief Minister Sarma-i ashi.

KLO yagi Assam aser West Bengal nungi tesem kar agiteta Kamtapur state akümtsü akhanger. Parnoki Kokrajhar district nung shishilembartem dang tashiyim agi sen meshia arur.

March 17, 2023 nungi parnoki shishilembar 10 shia dang Rs 5 lakh meshiba shiditem agütsüogo.

Anogo 10 tsüngda shishilembartemi KLO indang revolutionary mesüra war fund atema Rs. 5,00,000.00

agütsütsüla ta shidi nung shia lir.

Shishilembar aikati tetsübu agi ketdangpurtem dang iba osang mashir ajisüaka Chief Minister Sarma-i ozüng alema inyakeranema mapa inyakttsü nangzüko.

"Kokrajhar district police-i iba atema bushisüngdang ka tenzüko aser osang balala jangjadar. Onoki parnok kümzüka ayutsü nangzüko aser ozüng alema inyakeranema mapata ASP Kokrajhar Nabanita Sharma-i ashi.



Arunachal Pradesh yimtiba Itanagar nung G20 teshimtet nübotemi sobaliba sübotsü agir Handicrafts and Handlooms Exhibition semdanga senzüba angur. Itanagar nung ayongba G20 Research, Innovation, Initiative, Gathering (RIIG) senden nung linük 19 nungi teshimtet nübo 50 tashi aden. (Itanagar, March 26)

# Biden-i Mississippi nung emergency sangdong



Rolling Fork, Mississippi kübok Chuck's Diary Café nung pickup truck ka restaurant ka nung temdaka aliba noksa nung angur. Hokulbar aonung yipru tesashi arua Mississippi nung kongshia ki o jen aika raksatsü, power line raksaja nisunga 25 takum samatsü aser aika yiruja liasü.

**Washington, Metsüremi/ March 26 (Agencies):** Mississippi nung yipru tesashi ka agi kongshia nisung 25 takum samadaksüba sülen US Tir Joe Biden-i emergency sangdongtsü melaogo. Iba yipru yagi Alabama nunga nisung ka takum agi.

Iba yipru agi kongshir aliba state, tribal aser local area nung teyari agütsüsemstsü asoshi Biden-i federal teyari agütsütsü tuyu, ta Deobarnü White House sangdong kati ashi. Iba teyari ya yipru agi kongshir aliba Carroll, Humphreys, Monroe aser Sharkey tesemtem asoshi lir, ta sangdong ajanga ashi.

Iba yipru yagi US kübok Mississippi aser Alabama state tem nung ki kilen shisatsü, gari raksatsü aser kiyong kar okshia samatsü.

Mississippi indang emergency management agency ajanga Honibarnü tashinung asür 25 liasü aser yirur aika lir, ta ashi. Nisung pezü samar aliba ngutetogo, ta ashi.

Alabama nunga tziingsang majungdang trailer ka makepa nisung ka asü, ta Morgan County nung police ajanga Twitter nung metetdaksü.

Iba tornado ya ali nung ghonda ka shi lir Hokulbar

aonung Mississippi nung mile 170 shi nung teraksa agüja liasü, ta Jackson, Mississippi nung National Weather Service nungi meteorologist Nicholas Price-i ashi.

Asürtem rongnung nisung 12 bo Mississippi anüolen nisung 1,900 shi aliba Rolling Fork jila nungi lir. Iba jila nung alir shilem 75 shi sentsü tanak nisungtem lir aser nütsüng yongsük shilem pongu lemdang nung shilem ka federal poverty line tsünglang nung alir, ta United States Census data ajanga ashir.

Rolling Fork nung nisung aliba ki jana kumtsü, süngdong tem kongsang ama sükzüker ao aser gari tem tanur asayala amai onshishi. Iba jila indang water tower ali nung mesansar lir.

"Ozü yimi samaogo, saka onok temolung ajema mali. Onok tanaben tashi taitba nung meyiba shilangtsü," ta mayor Eldridge Walker-i ashi.

Governor Tate Reeves-i Honibarnü Silver City semdang aser yangjia state of emergency sangdonga liasü.

"Teraksa aser takoksa ajurua aliba tanü kuli nguogo. Nisung aliba ki, businesses ajunga raksatsü," ta pai Twitter nung zülü.

US Tir Joe Biden-i Mississippi nung tangokba noksa tem ngua temolung raksar ta ashi.

"Iba yipru tesashi agi kongshir alirtem, aser külem America nung yaritepba maparen inyaker ajak dang ya shiner, asenoki akokba nung yariteptsü. Mapang kobika südir süaka asenok yangji alitsü. Nenoki nüngdakba teyari agütsütsü asoshi asenok lungjemer inyaksü," ta Biden-i ashi.

Mississippi ketdangsür temi emergency shelters asem amenok aser item rongnung ka Rolling Fork kübok National Guard Armory nung lir. Federal Emergency Management Agency Director Deanne Criswell Deobarnü Mississippi-i aotsü, ta White House-i ashi.

Deobarnüa Mississippi aser Alabama nung tesem kar nung mopung tesashi, rer aser tornadoes agi kongshitsü akok, ta National Weather Service indang Storm Prediction Center ajanga ashi.

Yipru mechi Mississippi, Alabama aser Tennessee nung nisung 26,000 shi Honibar nikongdang ammag nung lir, ta PowerOutage.us website ajanga ashir.

## MENUNGRA BILEMTETER

Asür Opangkokba (27/3/2022 - 27/3/2023)



Nai onok toktsür or küm ka abensa aruaka ne temeim aser mapa tajung onok nungi kodanga mesamar. Na mali küm ka süidema aruaka na meblemtemi anogo ka danga süia meyoker.

Tanü iba anogo nung ojalai anir kinungertemi na m e n u n g r a sarasadema amonger.

**Temeim Ojala aser Kinungertem.**

## Menungra Bilemteter



TANGMONGBA (Asü : 27/3/2022)

"Kü mulungjang shisabulu onsara, ne tesünep agi kü nela peladaksür" Tenüngsang Ken 94: 19

Aba, na sür küm ka ajungdang, onoki na kanga menungra bilemteter.

~ Temeim Jala, Jabaso aser Kinungertem.

## Office of the Molujungba Kin Longsa

Mokokchung, Nagaland

H.Q Longsa

### TETUSHI KHONANG



Wb. T. Akangkokba Jamir aser Wt.l.Imtinenla Lemtur jabaso tamposang Wb. SÜNEP A Jamir Oscar aser Grammy award winner Wb. A.R Rahman-i ajayanga ayungba ken zülüba aser atenba tetokteba sentong (song writing and singing competition) takoker bezü (top four super winner) takok jenjang tongteta kin nem konang nüngsang bener arutsüba tepela osang iba atok ajanga lemsateper.

Takoksang Tsüngrem-i ne ajemalu, taküm, sempet aser wadang balala ajak nung moajang ta maneni sarasademer.

Kin tenüng nung, - K. Nungsangtemshi Tatar  
B. Chubatemshi Tatar  
B. Rentipenpa GB

# Tunisia anasa ano rong ka mükepök, nisung 19 asü



**Mahdia, Metsüremi/March 26 (Agencies):** Sub-Saharan Africa nungei refugee aser migrant tem Mediterranean ajanga Italy atongtsü merangba mapang Tunisia tziikum anasa rong mükepoka nisung 19 asü, ta human rights group kati ashi.

Nisung asüba osang ya Deobarnep sangong aser Italy indang ANSA news agency

ajanga ashiba agi, ghonda 24 tsüngta asylum bushir nisung 2,000 dak tema Italy meyong Lampedusa asentong tonga aruogo.

Honibarnü parnok aruba ya "record" ka lir ta agency ajanga ashi.

Forum for Social and Economic Rights (FTDES) nung ketdangsür Romdhane Ben

Amor-i ashiba agi, Sfax beaches nungi ayamesor arudang Tunisia nung Mahdia tziikum anasa refugee aser migrant tem mena aliba rong ya mükepök.

Tunisian coast guard temi iba rong nungi nisung pongu kumzüktet, ta pai ashi.

Tesüiba anogo pezü tsüngta refugee aser migrant tem bena aliba rong pongu shi Sfax tziikum anasa mükepoka nisung 67 samar bushir aser toku süogo.

Anogo pezü tsüngta coast guard temi rong 80 shi Italy leni oa aliba anendaksüogo aser nisung 3,000 dak tema pua lir, shirnok sub-Saharan African linüktem nungi timba lir.

Africa aser Middle East nung rara aser makamait nungi jena oa Europe nung alitsü teimla nung Sfax anasa tziikum nungi nisung jenti ayamesor.

Kuli makaba sub-Saharan Africa nung tem Tunisia ketdangsür temi aputsü merangba mapang tang tesüsa iba lendong ya ajurur.

United Nations data ajanga ashiba agi, taküm Tunisia nungi apusoa Itali atonger nisung 12,000 shi lir aser 2022 küm kasa mapang nisung 1,300 liasü.

Refugee aser migrant tem asoshi taoba mapang Libya nungisa apusoa liasü.

Taküm küm tenzüker mezüng ita asem tsüngta rong tem nung mener ayamesor

refugee aser migrant 14,000 dak tema Tunisia indang coast guard temi nokdanga lir, ta FTDES ajanga ashir, aser taoba küm kasa mapang nisung 2,900 liasü.

Italian coast guard temi southern Italian coast nung operation ana agidang asylum bushir nisung 750 shi kumzükgogo, ta Brehostibarnü shia liasü.

Tunisia nung rongsenren mejungra North Africa nungi refugee aser migrant tem aika Europe tonga aruba angutsü, ta Italy Ato Kilonser Giorgia Meloni-i Hokulbarnü shia liasü.

Pai International Monetary Fund aser danga linük kar dang tekeraba nung Tunisia yaritsü

## NECDC Senior Men's Interstate Friendship tournament ayonger

**Dimapur, Metsüremi/March 26 (TYO):** Mezüngbuba North East Cricket Development Committee, NECDC Senior Men's Interstate Friendship tournament March 29 nungi April 3 tashi Nagaland Cricket Stadium aser Sovima Cricket ground nung asayatsü.

NECDC nung Northeast state trok; Arunachal Pradesh, Manipur, Meghalaya, Mizoram, Nagaland aser Sikkim densema lir, shirnok Board of Control for Cricket in India (BCCI) kübok North East Zone nung densema lir. Iba asayamung ya Nagaland Cricket Association-i ayongzüka asayatsü.

Deobarnü NCA office nung osangbenertem den sensaksemba mapang

Nagaland Cricket Association, Honorary secretary, Hyunilo Anilo Khing-i, district ajak nung school jenjang nungi tenzüka asayamung balala ayongzüka grass root level nungi cricket asaya ajungkettsü atema association-i takokba tashi inyokdar, ta ashi.

Asayamung ayongzüka asayaba dak alia association-i concrete practice pitch tem yanglutsüogo aser state kübok club aser association balala nem sports kits tem agüja arudar, ta paisa ashi.

Pai ashiba agi, Nagaland aser northeast state tem nung saisapongtem rongnung football ya mezüngbuba lir. Ajisüaka cricket asaya-a renlokyonga odar aser lenmang shitak nung odar ta ashi.

Iba amala asayamung ayongzüka asayaba ajanga grass root level nungi cricket asaya ajungkettsü aser lanur asayatem ajungmesotsü. NECDC state tem yongtsü nung cricket dak sendakba inyakyimtem ajungketba dang masü iba ajanga state tem tsüingda tangatetep tajungba kümdaktsütsü, ta secretary-i shisem.

Iba asayamung atema State trok ya telok ana küma lemsar lir aser asayatem league basis nung asayar temaba team pezü semi-final atema qualify asütsü. Asayamung mapang asayatem Board of Control for Cricket in India (BCCI) Zonal tournament nung asayatsü atema North East Zone team asoshi shimtsü.

## Swiss Open: Satwiksairaj & Chirag nati tebur tarep asaya kokogo



**Metsüremi/March 26, 2023 (Agencies):** India nung tebur tarep asayar Satwiksairaj Rankireddy aser Chirag Shetty nati Deobarnü Swiss Open Super Series 300 badminton tournament tebur tarep asaya final nung Ren Xiangyu aser Tan Qiang na koka title benogo.

World number six aser second-seeded India nung tarep Satwiksairaj aser Chirag nati final asaya nung China nung tarep ya 21-19 24-22 agi koka liasü.

Semifinal asaya nung

Satwiksairaj Rankireddy aser Chirag Shetty nati Malaysia nung third seed tarep Ong Yew Sin aser Teo Ee Yi na 21-19 17-21 21-17 agi koka liasü. Telok ana tsüingda semifinal asaya ya ghonda ka ser minute teku asaya liasü.

Kasa asayamung quarter-final nung Satwik aser Chirag nati minute 84 tashi kanga meranga asayar Denmark nung tarep Jeppe Bay aser Lasse Molhede na 15-21 21-11 21-14 agi koka liasü.

All England Championships

nung kanga kara tsükatokba sülen iba asayamung akokba ajanga tena asayaba yimya dak tali temulung lemteta kümdaktsütsü imlar.

Iba asayamung akokba ya taküm Satwik aser Chirag na asoshi mezüngbuba asayamung akokba asütsü.

Tenati tang tashi nung world tour title ajak senteper pongububa kokogo. Tenati taoba küm India Open aser French Open na akok aser iba masüidang 2019 küm Thailand Open aser 2018 küm Hyderabad Open koker liasü.

Satwik aser Chirag natisa 2022 Commonwealth Games nung gold medal nguogo.

India nung asayartemi Swiss Open nung kanga junga asaya arudar aser tang tashi nung PV Sindhu (2022), Saina Nehwal (2011, 2012), Kidambi Srikanth (2015) aser HS Prannoy (2016) nung ajaki iba asayamung koka lir.



2023 IBA Women's Boxing World Championships, New Delhi nung 50 kg final nung Vietnam tsür Nguyen Thi Tam akokba sülen Nikhat Zareen tangokba noksa nung angur.

## ISSF World Cup: Kaur Samra-i Bronze medal angu



**New Delhi, Metsüremi/March 26 (Agencies):** India nung lanur shooter Sift Kaur Samra-i Deobarnü ISSF Rifle/Pistol World Cup nung 50m rifle 3P event nung bronze medal ngua international jenjang nung senior category nung asayaba mapang medal tanabuba nguogo.

China-i amokbanger asayaba anogo ka nung iba asaya ya Zhang Qiongyue-i koka liasü. National championship tesüsabuba koker alila Samra ranking round nung point 403.9 nguteta tasembuba jenjang nung tembang aser Zhang (414.7 points) o Czech Republic tsür Aneta Brabcova (411.3) na final round asaya liasü.

Gold-medal round nung Zhand-i 16-8 agi Czech tsür la ya koka liasü.

Medals table nung India team China sülen tanabuba jenjang nung lir. India team-i tang tashi nung gold ka, silver ka aser bronze medal pongu ngua lir. Samra-i taoba küma Changwon, China nung World Cup asayaba mapang bronze medal ka ngur liasü.

3P event preliminary round nung air rifle nung world championships silver medalist Anjum Moudgil dak ajaki rangloker liasü. Ajisüaka

Deobarnü Samra-i kanga junga asaya aser positions asemprongla nung kanga junga khateta qualification round tembanga tashi nung point 588 nguteta la tanabuba jenjang nung liasü.

Samra-i kneeling position nung ajak senteper point 194 (99, 95), prone position nung 200 (100, 100) aser standing position nung point 194 (97, 97) ngua liasü. Kasa mapang nung Anjum-i point 583 dang nguteta la tenetbuba nung liasü. India tsürtem rongnungi Manini Kaushik bo qualify mesüteti liasü.

Arishi küm 21 tain Samra, shibai World Cup masaya tsüingda New Delhi nung trials mapang kanga junga asaya liasü, lai ranking asaya nung 'standing' round asem junga masayatet aser ibayongji Zhang aser Brabcova na memeneptsüsa aküm.

India tsür la yagi kneeling position- 102.2 (51.7, 50.5) aser prone- 103.4 (51.8, 51.6) nungbo junga asaya saka 'standing' position nung junga masayateti liasü. Mezüngbuba standing series nung lai 50.4 dang angu aser iba sülen maneni junga masayateti point 196.3 (50.4, 49.0, 49.2 & 49.7) dang ngua tasembuba jenjang nung tembanga liasü.

## IWF World Youth Championships: Dhanush & Jyoshna nati medal angu

**Metsüremi/March 26, 2023 (Agencies):** Durres, Albania nung IWF World Youth Championships tenzüker mezüngbuba anogo India nung weightlifters Dhanush Loganathan aser Jyoshna Sabar nati tena tata asaya nung bronze medal nguogo.

Tetsür 40kg event nung toktepa mapang arishi küm 14 tain Jyoshna-i ajak senteper seret 115kg (snatch 53kg aser clean & jerk 62kg) ajungketa Honibar aonung bronze medal ngua liasü.

Jyoshna-i snatch section nung silver medal angu ajisüaka clean and jerk category nung asayar tenet rongnungi trokbuba nung

tembanga liasü.

Kasa mapang nung Dhanush-i tebur 49kg event nung seret 200 (88kg+112kg) ajungketteta Filipinos Prince K. Delos Santos aser Eron Borres na sülen tasembuba jenjang nung tembanga liasü.

Arishi küm 16 tain asayar yagi snatch category nungbo silver medal ngua liasü.

Iba asayamung nung arishi küm 13 nungi 17 tsüingda aliba lifter temi shilem agir.

Continental aser World Championships nungbo snatch aser clean & jerk atema medal balala agütsür, ajisüaka Olympic Games nungbo category anaprongla senteper medal ka dang agütsür.

**BILEMDANGANG**

"Pei tia peisasa yanglur."